



## SLUŽBA ZA REVIZIJU FINANSIRANJA POLITIČKIH STRANAKA

Na osnovu člana 14. stav (1) Zakona o finansiranju političkih stranaka («Službeni glasnik BiH» broj 22/00, 102/09 i 54/10), člana 24. Pravilnika o godišnjim finansijskim izvještajima političkih stranaka («Službeni glasnik BiH» broj 61/06) i člana 12. Pravilnika o administrativnim procedurama pregleda, kontrole i revizije finansijskih izvještaja političkih stranaka («Službeni glasnik BiH» broj 103/08), izdajem

### IZVJEŠTAJ O PREGLEDU GODIŠNJEG FINANSIJSKOG IZVJEŠTAJA ZA 2009. GODINU STRANKE DEMOKRATSKE AKCIJE

Broj: 03-07-6-51/10  
Sarajevo, 31. mart 2011. godine

## SADRŽAJ

MIŠLJENJE REVIZORA.....	3
1. UVOD.....	4
2. PREDSTAVLJANJE POLITIČKE STRANKE.....	4
3. OPIS PREGLEDA I KONTROLE FINANSIJSKOG IZVJEŠTAJA .....	5
Predmet pregleda i kontrole.....	5
Cilj pregleda i kontrole.....	5
Obim pregleda i kontrole.....	5
4. PRETHODNE KONTROLE I REVIZIJE.....	5
5. NALAZI I PREPORUKE.....	5
5.1. NALAZI.....	5
5.2. PREPORUKE.....	10

## MIŠLJENJE REVIZORA

Služba za reviziju finansiranja političkih stranaka izvršila je pregled godišnjeg finansijskog izvještaja Stranke demokratske akcije za 2009. godinu.

Rukovodstvo stranke je odgovorno za finansijske izvještaje, postupanje stranke u skladu sa Zakonom o finansiranju političkih stranaka i uspostavljanje efikasnog sistema internih kontrola.

Pregled smo obavili u skladu sa revizijskim standardima primjenjivim na angažmanu u pregledu. Ovi standardi zahtijevaju da planiramo i izvršimo pregled da bi dobili umjerenu pouzdanost da stranka nije značajno kršila odredbe Zakona o finansiranju političkih stranaka.

Pregled je ograničen na kontrolu godišnjeg finansijskog izvještaja političke stranke i primjenu analitičkih procedura na podacima iz finansijskih izvještaja, pa prema tome ne obezbjeđuju pouzdanost koja bi se dobila izvršenom revizijom u prostorijama stranke.

Na osnovu našeg pregleda utvrđeno je sljedeće:

- 1. Stranka demokratske akcije prekršila je odredbe člana 3. stav (1) i stav (2), člana 6., člana 8. stav (1) i stav (2) i člana 11. stav (1) i stav (4) Zakona o finansiranju političkih stranaka.**
- 2. Stranka je prekršila odredbe člana 11. stav (3) Zakona o finansiranju političkih stranaka jer nije popunila obrasce finansijskog izvještaja u skladu sa Pravilnikom o godišnjim finansijskim izvještajima političkih stranaka.**

**Na osnovu našeg pregleda, odnosno kontrole finansijskog izvještaja, osim gornjih napomena pod 1. i 2., nismo zapazili ništa značajno što bi ukazalo na nedostatke u finansijskom izvještaju ili na finansiranje ove političke stranke suprotno odredbama Zakona o finansiranju političkih stranaka.**

## 1. UVOD

Služba za reviziju finansiranja političkih stranaka (u daljem tekstu: Služba za reviziju) izvršila je pregled godišnjeg finansijskog izvještaja Stranke demokratske akcije za 2009. godinu.

Pregled i kontrola finansijskog izvještaja su provedeni u skladu sa članom 25. Pravilnika o godišnjim finansijskim izvještajima političkih stranaka i članom 2. Pravilnika o administrativnim procedurama pregleda, kontrole i revizije finansijskih izvještaja političkih stranaka.

Zbog činjenice da nije obavljena revizija u prostorijama političke stranke, postoji mogućnost da pojedine materijalno značajne greške ne budu otkrivene.

Prema podacima iz godišnjeg finansijskog izvještaja, Stranka demokratske akcije iskazala je ukupne prihode u iznosu od 4.152.224,02 KM<sup>1</sup>, čija struktura je data u sljedećoj tabeli:

Red. br.	Vrsta prihoda	Iznos u KM	Učešće u uk. prih. %
1	Članarina	58.863,65	1,42%
2	Prilozi fizičkih lica	289.273,64	6,97%
3	Prilozi pravnih lica	26.000,00	0,63%
4	Prihodi od imovine	74.830,00	1,80%
5	Prihodi od pr.lica	0,00	0,00%
6	Prihodi od poklona	0,00	0,00%
7	Prihodi iz budžeta	3.703.256,73	89,19%
	Ostali prihodi		0,00%
	<b>Ukupni prihodi:</b>	<b>4.152.224,02</b>	<b>100,00%</b>

U godišnjem finansijskom izvještaju stranka je iskazala ukupne rashode u iznosu 4.190.571,54 KM<sup>2</sup>.

## 2. PREDSTAVLJANJE POLITIČKE STRANKE

Naziv političke stranke: Stranka demokratske akcije. Skraćeni naziv stranke je SDA.

Rješenjem Višeg suda u Sarajevu broj R-I-7/90 od 13.06.1990. godine, Stranka demokratske akcije je upisana u registar Udruženja.

Sjedište političke stranke je u Sarajevu, ulica Titova 9A.

Za zastupanje stranke ovlašten je Sulejman Tihić, predsjednik.

Lice ovlašteno za podnošenje finansijskih izvještaja za 2009. godinu je Amir Zukić.

Prema podacima iz godišnjeg finansijskog izvještaja za 2009. godinu, organizacionu strukturu Stranke demokratske akcije čine:

- Centrala SDA,
- 9 kantonalnih odbora,
- 6 regionalnih odbora,
- SDA Brčko Distrikt BiH,
- SDA Gradski odbor Mostar, i
- 117 općinskih odbora.

<sup>1</sup> Podaci iz ispravljenog obrasca 3 (ukupni prihodi), koji je dostavljen dana 02.03.2011. godine.

<sup>2</sup> Podaci iz ispravljenog obrasca 4 (ukupni rashodi), koji je dostavljen dana 02.03.2011. godine.

### 3. OPIS PREGLEDA I KONTROLE FINANSIJSKOG IZVJEŠTAJA

**Predmet pregleda i kontrole** je godišnji finansijski izvještaj Stranke demokratske akcije za 2009. godinu.

**Cilj pregleda i kontrole** je da revizor na bazi finansijskog izvještaja pokuša da ustanovi da li je politička stranka u izvještajnom periodu postupala u skladu sa odredbama Zakona o finansiranju političkih stranaka. Ukoliko revizor na bazi kontrole finansijskog izvještaja utvrdi određena kršenja navedenog zakona, ocjenjuje da li je potrebno izvršiti terensku reviziju da bi mogao izraziti mišljenje o tome da li se stranka finansirala u skladu sa Zakonom o finansiranju političkih stranaka.

**Obim pregleda i kontrole** finansijskih izvještaja Stranke demokratske akcije obuhvata kontrolu i provođenje analitičkih procedura radi utvrđivanja usklađenosti podataka koje je stranka iskazala u finansijskom izvještaju sa odredbama Zakona o finansiranju političkih stranaka, odnosno usklađenosti izvora finansiranja i načina trošenja sredstava, sa posebnim naglaskom na priloge fizičkih i pravnih lica, prihode od imovine i prihode iz budžeta.

### 4. PRETHODNE KONTROLE I REVIZIJE

Izvršeni su revizija i pregledi godišnjih finansijskih izvještaja Stranke demokratske akcije za 2004., 2005., 2006. i 2007. godinu i izdati su izvještaji o reviziji, odnosno pregledu sa mišljenjem revizora, nalazima i preporukama revizije.

Služba za reviziju izvršila je reviziju godišnjeg finansijskog izvještaja za 2008. godinu i postizbornog finansijskog izvještaja – Lokalni izbori 2008. Stranke demokratske akcije, nakon koje je izdat izvještaj o reviziji sa mišljenjem revizora, nalazima i preporukama. Revizijom je utvrđeno da je Stranka demokratske akcije prekršila odredbe člana 3. stav (2), člana 4. stav (2), člana 6., člana 8. stav (1) i člana 11. stav (1) i stav (3) Zakona o finansiranju političkih stranaka.

#### **Nerealizovane preporuke:**

Na osnovu uočenih nedostataka u godišnjem finansijskom izvještaju za 2009. godinu, utvrđeno je da Stranka demokratske akcije nije ispoštovala preporuke date u izvještaju o reviziji, odnosno da je i u 2009. godini postupala suprotno odredbama člana 3. stav (1) i stav (2), član 6., člana 8. stav (1) i člana 11. stav (1) i stav (3) Zakona o finansiranju političkih stranaka.

### 5. NALAZI I PREPORUKE

#### 5.1. NALAZI

a) **Na osnovu obavljenog pregleda utvrđeno je da je stranka postupala suprotno odredbama člana 3. stav (1)<sup>3</sup> i stav (2)<sup>4</sup> Zakona o finansiranju političkih stranaka.**

(1) Kantonalni odbor SDA Zeničko-Dobojskog kantona i Općinski odbor SDA Zenica su tokom 2009. godine izdavali imovinu (objekat Hotela „Balkan“) koja nije u vlasništvu stranke i na taj način ostvarili prihode u iznosu od 17.780,00 KM<sup>5</sup>, čime su prekršene odredbe 3. stav (1) Zakona o finansiranju političkih stranaka.

<sup>3</sup> Politička stranka može osigurati sredstva iz: a) članarina; b) priloga pravnih i fizičkih lica; c) prihoda od imovine u vlasništvu stranke; d) budžeta BiH za finansiranje parlamentarnih grupa u skladu s članom 10. Zakona o finansiranju političkih stranaka, kao i iz entitetskih budžeta i svih njihovih nižih organizacionih jedinica u skladu s entitetskim zakonima; e) dobiti od prihoda preduzeća u vlasništvu političke stranke.

<sup>4</sup> Preduzeće u vlasništvu političke stranke može se baviti samo djelatnošću vezanom za kulturu ili izdavačku djelatnost.

<sup>5</sup> Napominjemo da je, osim navedenih 17.780,00 KM, Stranka demokratske akcije ostvarila sredstva od izdavanja prostorija u iznosu od 5.000,00 KM. Na osnovu dopisa od 31.12.2009. godine, utvrđeno je da je SDA sredstva u iznosu od 5.000,00

Naime, Općina Zenica je 04.08.1997. godine ustupila Kantonalnom odboru SDA Zeničko-Dobojskog kantona pravo korištenja objekta Hotela „Balkan“ na neodređeno vrijeme. Na osnovu ugovora Stranka demokratske akcije je izvršila adaptaciju ovog objekta. Dana 22.08.2007. godine, Stranka demokratske akcije je podnijela zahtjev Općinskom sudu Zenica za uknjižbu navedene nekretnine u vlasništvo stranke. Tokom obavljanja pregleda godišnjeg finansijskog izvještaja za 2009. godinu Stranka demokratske akcije je dostavila Službi za reviziju dokumentaciju iz koje je utvrđeno da postupak uknjižbe nije završen.

- (2) Tokom obavljanja revizije finansijskih izvještaja u periodu od 2006. do 2009. godine utvrđeno je da je Stranka demokratske akcije osnivač i vlasnik „Nezavisne radio televizije Travnik“ d.o.o., sa sjedištem u Travniku. Obzirom da je odredbama člana 3. stav (1) i (2) Zakona o finansiranju političkih stranaka propisano da politička stranka može sredstva za svoj rad obezbijediti i sredstvima iz dobiti preduzeća koja su u vlasništvu političke stranke i da se preduzeće u vlasništvu političke stranke može baviti djelatnošću vezanom za kulturu ili izdavačkom djelatnošću, utvrđeno je da je Stranka demokratske akcije prekršila odredbe člana 3. stav (2) Zakona o finansiranju političkih stranaka.

Na osnovu Obavijesti Regulatorne agencije za komunikacije od 09.07.2009. godine utvrđeno je da je u toku postupak promjene vlasničke strukture „Nezavisne radio televizije Travnik“ d.o.o. Travnik, a koji je pokrenula Stranka demokratske akcije.

Imajući u vidu činjenicu da Stranka demokratske akcije nije Službi za reviziju dostavila dokumentaciju iz koje se može utvrditi da je tokom 2009. godine došlo do promjene vlasničke strukture u ovom pravnom licu, odnosno dokaze da Stranka demokratske akcije nije vlasnik „Nezavisne radio televizije Travnik“ d.o.o., mišljenja smo da stranka i dalje krši odredbe člana člana 3. stav (2) Zakona o finansiranju političkih stranaka<sup>6</sup>.

**b) Stranka demokratske akcije prekršila je odredbe člana 6. Zakona o finansiranju političkih stranaka.**

Na osnovu dodatne dokumentacije utvrđeno je da je OO SDA Doboj Jug za svoj rad koristio prostorije fizičkih lica bez naknade. Obzirom da stranka nije iskazala nenovčanu donaciju u godišnjem finansijskom izvještaju, prekršene su odredbe člana 6. Zakona o finansiranju političkih stranaka.

**c) Stranka demokratske akcije prekršila je odredbe člana 8. stav (1) i stav (2) Zakona o finansiranju političkih stranaka.**

- (1) Na osnovu dodatne dokumentacije, utvrđeno je da je Stranka demokratske akcije, odnosno da su odbori Stranke demokratske akcije koristili bez naknade ili po povoljnijim uslovima prostorije općina, što je suprotno odredbama člana 8. stav (1) Zakona o finansiranju političkih stranaka.

- Na osnovu Odluke o postupku davanja u zakup poslovnih prostorija od 27.11.2007. godine, Stranka demokratske akcije je koristila bez naknade prostorije u vlasništvu Općine Živinice, površine 34 m<sup>2</sup>. Korištenjem bez naknade ovih prostorija, SDA je primila zabranjeni prilog u iznosu od 1.224,00 KM<sup>7</sup>.

---

KM evidentirala na kontu razgraničenih prihoda, a na osnovu Odluke Nadzornog odbora stranke o zabrani izdavanja prostorija do okončanja postupka uknjižbe.

<sup>6</sup> Kontrolom nije utvrđeno da je Stranka demokratske akcije ostvarila prihod od dobiti ovog pravnog lica.

<sup>7</sup> Početna cijena zakupnine iznosi najmanje 3,00 KM/m<sup>2</sup>.

- OO SDA Fojnica je bez naknade koristio poslovne prostorije u vlasništvu Općine Fojnica površine 26,78 m<sup>2</sup>. Obzirom da je Odlukom o visini zakupnine za izdate u zakup poslovne prostore Općine Fojnica, broj: 01-05-490/02 od 28.10.2002. godine, utvrđeno da mjesečna cijena zakupa iznosi 3,00 KM/m<sup>2</sup>, OO SDA Fojnica je primio prilog u iznosu od 964,08 KM.
- Prema podacima koje je dostavila Općina Ilijaš, utvrđeno je da je Stranka demokratske akcije bez naknade koristila prostorije, površine 37,96 m<sup>2</sup>, kojim pravo raspolaganja ima Općina Ilijaš. Vrijednost zabranjenog priloga u 2009. godini je iznosila 3.644,16 KM<sup>8</sup>.
- OO SDA Novo Sarajevo je koristio bez naknade prostorije Općine Novo Sarajevo, površine 81,40 m<sup>2</sup>. Obzirom da stranka nije plaćala prostor, primila je nenovčanu donaciju u iznosu 4.884,00 KM.
- Općinski odbor SDA Centar Sarajevo je na osnovu Ugovora o zakupu poslovnih prostorija, zaključenim 31.03.2008. godine sa Općinom Centar Sarajevo, koristio poslovni prostor površine 105 m<sup>2</sup>, po cijeni koja je ugovorena u iznosu od 1,00 KM po m<sup>2</sup>. Prema Odluci o dodjeli u zakup poslovnih zgrada i prostorija Općine Centar Sarajevo - prečišćeni tekst ("Službene novine Kantona Sarajevo", broj 20/09), najniža cijena zakupnine u I zoni iznosi 20,00 KM po m<sup>2</sup>. Korištenjem poslovnog prostora u 2009. godini po cijeni koja je ispod cijene utvrđene navedenom odlukom, Stranka demokratske akcije je primila prilog Općine Centar u iznosu od 23.940,00 KM.
- Općinski odbor Stranke demokratske akcije Ilidža je u periodu od 01.01. do 30.09.2009. godine koristio bez naknade prostorije Općine Ilidža, površine 61 m<sup>2</sup>. Dana 07.10.2009. godine, OO SDA Ilidža je sa Općinom Ilidža sklopio Ugovor o zakupu poslovnog prostora, broj: 05-23-818/2-08. Ugovorom je definisano da će OO SDA Ilidža, počev od 01.10.2009. godine, koristiti poslovni prostor površine 63,00 m<sup>2</sup>, po cijeni koja je ugovorena u iznosu od 2,00 KM po m<sup>2</sup>, odnosno 10% od početne cijene zakupa po m<sup>2</sup> koja iznosi 20,00 KM za ekstra zonu u kojoj se nalazi navedeni poslovni prostor. Korištenjem poslovnog prostora po cijeni koja je ispod početne, Stranka demokratske akcije je primila prilog Općine Ilidža u iznosu od 3.402,00 KM.

Osim navedenog, Služba za reviziju je utvrdila i sljedeće:

- Stranka demokratske akcija primila je nenovčanu donaciju Općine Vareš u iznosu od 600,00 KM. Naime, Služba za reviziju je izvršila uvid u podatke koje je dostavila Općina Vareš i utvrdila da je ova Općina izvršila plaćanje računa za zakupninu poslovnih prostorija u vlasništvu DD „SNAGA“ Vareš koje je tokom 2009. godine za svoj rad koristio Općinski odbor SDA Vareš.
- Općinski odbor SDA Donji Vakuf koristi bez naknade prostorije u vlasništvu Općine Donji Vakuf, površine 80 m<sup>2</sup>.
- Općinski odbor SDA Srebrenica je na Osnovu odluke Načelnika Opštine Srebrenica od 03.10.2005. godine koristio bez naknade prostorije u zgradi stare Policijske stanice u Srebrenici.
- Na osnovu Odluke Općinskog načelnika, OO SDA Jablanica koristi prostorije u zgradi SP-32 bez naknade.
- Općinski odbor SDA Jajce je koristio prostorije Općine Jajce bez naknade, a na osnovu Ugovora o zakupu poslovnih prostorija od 03.09.2004. godine.
- Stranka demokratske akcije je na osnovu Ugovora o zakupu poslovnih prostorija koji je sklopljen između Opštine Novi Grad i Kluba odbornika Stranke demokratske akcije, bez naknade koristio prostorije Opštine Novi Grad, površine 33,25 m<sup>2</sup>.
- Općinski odbori Stranke demokratske akcije Hadžići, Novi Grad Sarajevo, Stari Grad, Orašje, Sanski Most, Bosanska Krupa, Srebrenik i Živinice koriste bez naknade prostorije kojim raspoložu općine Hadžići, Novi Grad Sarajevo, Stari Grad, Orašje, Sanski Most, Bosanska Krupa, Srebrenik i Živinice.

---

<sup>8</sup> U skladu sa članom 6. Odluke o načinu i visini plaćanja zakupnine poslovnih prostora na području Općine Ilijaš mjesečna zakupnina za poslovne prostore iznosi 8,00 KM po m<sup>2</sup>.

(2) Stranka demokratske akcije prekršila je odredbe člana 8. stav (2) Zakona o finansiranju političkih stranaka<sup>9</sup> jer je primila prilog privatnog preduzeća „Herceg” doo Srebrenik u iznosu od 100,00 KM, koje je tokom 2009. godine imalo sklopljen ugovor sa Općinom Tuzla. KO Tuzlanskog kantona je iskazao ovaj prilog u obrascu 3-b (prilozi pravih lica).

**d) Stranka je prekršila odredbe člana 11. stav (1), stav (3) i stav (4) Zakona o finansiranju političkih stranaka.**

Na osnovu obavljenog pregleda utvrđeno je da Stranka demokratske akcije nije u svojim poslovnim knjigama evidentirala sve prihode i rashode, čime je prekršila odredbe člana 11. stav (1) Zakona o finansiranju političkih stranaka. Služba za reviziju je utvrdila da SDA nije u poslovnim knjigama evidentirala promet ostvaren po transakcijskom računu, prihode iz budžeta, prihode od imovine, troškove zakupa, odnosno troškove OO SDA Bosanska Gradiška.

Stranka demokratske akcije prekršila je odredbe člana 11. stav (3) Zakona o finansiranju političkih stranaka jer obrasce godišnjeg finansijskog izvještaja za 2009. godinu nije popunila u skladu sa Pravilnikom o godišnjim finansijskim izvještajima političkih stranaka.

(1) Kontrolom dodatne dokumentacije utvrđeno je da Stranka demokratske akcije nije u godišnjem finansijskom izvještaju iskazala podatke o transakcijskom računu OO SDA Bosanska Gradiška broj: 1830300000218595 koji je otvoren kod Una banke, čime je prekršila odredbe člana 11. Pravilnika o godišnjim finansijskim izvještajima političkih stranaka. OO SDA Bosanska Gradiška je 01.01.2009. godine na ovom transakcijskom računu imao sredstva u iznosu od 715,93 KM. Prema podacima sa izvoda tokom 2009. godine promet ulaza je iznosio 5.325,42 KM, promet izlaza 4.247,00 KM, dok je saldo na dan 31.12.2009. godine iznosio 1.794,35 KM.

Uvidom u obrazac 2-1 utvrđeno je da nije iskazan promet ostvaren putem blagajne OO SDA Bosanska Gradiška, čime su prekršene odredbe člana 12. Pravilnika o godišnjim finansijskim izvještajima političkih stranaka.

(2) Stranka demokratske akcije prekršila je odredbe člana 13. i člana 16. Pravilnika o godišnjim finansijskim izvještajima političkih stranaka jer nije u godišnjem finansijskom izvještaju iskazala tačne podatke o prihodima od imovine. U skladu sa odredbama člana 16. i člana 13. Pravilnika o godišnjim finansijskim izvještajima političkih stranaka, Stranka demokratske akcije je u obrazac 3-c (prihodi od imovine) trebala unijeti iznos ostvarenog prihoda i iznos sredstava koje je politička stranka naplatila, odnosno u obrazac 3 (ukupni prihodi) unijeti iznos ostvarenih prihoda od imovine.

Pregledom je utvrđeno da je OO SDA Novi Grad Sarajevo u godišnjem finansijskom izvještaju iskazao prihode od imovine, odnosno prihode ostvarene po osnovu izdavanja u zakup poslovnih prostorija pravnim i fizičkim licima.

- Kontrolom dodatne dokumentacije utvrđeno je da je Općinski odbor SDA Novi Grad Sarajevo ispostavio fakture fizičkom licu za zakup poslovnog prostora - kioska za prva tri mjeseca 2009. godine u ukupnom iznosu od 405,00 KM. Prema Ugovoru o zakupu poslovnog prostora, stranka je trebala fizičkom licu izdati fakture u ukupnom iznosu od 1.620,00 KM, odnosno za period od 12 mjeseci počev od 01.01.2009. godine. Na osnovu navedenog je utvrđeno da su prihodi od izdavanja prostorija fizičkom licu manje iskazani za 1.215,00 KM.

---

<sup>9</sup> Privatna preduzeća koja obavljaju javne usluge na osnovu ugovora sa vladom ne mogu finansijski pomagati političke stranke.



- Stranka demokratske akcije je u obrascu 3-c iskazala prihode od izdavanja prostora pravnom licu NIF COMERCE-MAKS d.o.o. Kiseljak u iznosu od 3.300,00 KM.<sup>10</sup> Služba za reviziju je utvrdila da je Općinski odbor SDA Novi Grad u skladu sa Ugovorom o zakupu poslovnog prostora trebao iskazati prihode u iznosu od 6.600,00 KM.

- S druge strane, SDA je prihode od izdavanja prostora Lutriji BiH i Duhanprometu iskazala za 2.000,00 KM, odnosno 225,00 KM više u odnosu na ostvarene<sup>11</sup>.

Na osnovu svega navedenog, utvrđeno je da su prihodi od izdavanja prostora iskazani za 1.885,00 KM manji u odnosu na ostvarene.

Napominjemo da je Stranka demokratske akcije prihode od izdavanja prostora u svojim poslovnim knjigama za 2009. godinu evidentirala samo u iznosu sredstava koje je i naplatila u 2009. godini.

(3) Uvidom u obrazac 3-c godišnjeg finansijskog izvještaja utvrđeno je da je Stranka demokratske akcije prihode od prodaje osnovnih sredstava u iznosu od 14.000, 00 KM, odnosno 10.010,00 KM iskazala kao prihode od imovine, što nije u skladu sa članom 13. i članom 15. Pravilnika o godišnjim finansijskim izvještajima političkih stranaka.

(4) Stranka demokratske akcije nije u obrascu 3-f (prihodi iz budžeta) iskazala sve prihode koje tokom 2009. godine primila iz budžeta, odnosno nije obrazac 3-f popunila u skladu sa članom 19. Pravilnika o godišnjim finansijskim izvještajima političkih stranaka.

- Na osnovu dopisa Opštine Čajniče, utvrđeno je da je Stranka demokratske akcije iz budžeta ove opštine u 2009. godini primila sredstva u iznosu od 350,00 KM. Sredstva su uplaćena autoprevozniku za prevoz djece, a na osnovu Zahtjeva Regionalnog odbora SDA Gornje Podrinje. Stranka je u skladu sa članom 19. Pravilnika o godišnjim finansijskim izvještajima političkih stranaka imala obavezu da prihode iz budžeta ove opštine iskaže u obrascu 3-f.

- Stranka demokratske akcije nije u obrascu 3-f (prihodi iz budžeta) iskazala prihode iz budžeta Opštine Gradiška u iznosu od 5.325,42 KM.

(5) Na osnovu obavljenog pregleda utvrđeno je da stranka u godišnjem finansijskom izvještaju nije iskazala sve troškove zakupa za poslovne prostorije, i to:

- Stranka demokratske akcije nije iskazala troškove zakupa poslovnih prostorija koje je koristio OO SDA Teslić u iznosu od 84,00 KM.

- OO SDA Kalesija je tokom 2009. godine koristio prostorije Općine Kalesija. Prema podacima koje je dostavila Općina Kalesija zakupnina za 2009. godinu za prostorije koje je koristila Stranka demokratske akcije je iznosila 791,04 KM. Uvidom u obrazac 4-1 godišnjeg finansijskog izvještaja utvrđeno je da OO SDA Kalesija nije iskazao troškove zakupnine.

- Općinski odbor SDA Velika Kladaša nije u godišnjem finansijskom izvještaju iskazao troškove zakupnine. Prema podacima iz ugovora zakupnina za 2009. godinu je iznosila 2.200,00 KM.

- Na osnovu ugovora o zakupu utvrđeno je da su troškovi zakupa za prostorije koje je koristio OO SDA Lukavac iznosili 4.080,00 KM. SDA u obrascu 4-1 nije iskazala troškove zakupa.

- Troškovi zakupa za poslovne prostorije koje je koristio OO SDA Prijedor su iskazani manje za 1.250,00 KM, dok su troškovi zakupa OO SDA Brčko Distrikt iskazani manje za 200,00 KM.

- Stranka u finansijskom izvještaju nije iskazala troškove zakupa za poslovni prostor koji je koristila Centrala SDA, niti je iskazala obaveze prema Službi za zajedničke poslove organa i tijela Federacije Bosne i Hercegovine.

<sup>10</sup> Stranka je u 2009. godini knjižila prihode od zakupnine u ukupnom iznosu od 3.300,00 KM, od čega na fakture za oktobar, novembar i decembar 2008. godine otpada iznos od 1.650,00 KM, odnosno za januar, februar i mart 2009. godine 1.650,00 KM.

<sup>11</sup> Stranka je u poslovnim knjigama za 2009. godinu evidentirala i prihode od zakupnine za decembar 2008. godine.

Obzirom da Stranka demokratske akcije nije u dodatnoj dokumentaciji dostavila Ugovor o zakupu poslovnih prostorija koje koristi Centrala Stranke demokratske akcije (prostorije u Titovoj 9a), prekršene su odredbe člana 11. stav (4) Zakona o finansiranju političkih stranaka.

- (6) Služba za reviziju je utvrdila da Stranka demokratske akcije nije u obrascu 5 (pozajmice, krediti i dugovi) iskazala sve obaveze na dan 31.12.2009. godine, odnosno nisu iskazane sve obaveze prema pravnim i fizičkim licima po osnovu zakupa<sup>12</sup>, čime su prekršene odredbe člana 23. Pravilnika o godišnjim finansijskim izvještajima političkih stranaka.

## 5.2. PREPORUKE

*Preporučuje se Stranci demokratske akcije da se pridržava odredaba Zakona o finansiranju političkih stranaka, a posebno na osnovu uočenih nedostataka se preporučuje:*

- *da postupa u skladu sa odredbama člana 3. stav (1) i stav (2), člana 6., člana 8. stav (1) i stav (2) i člana 11. stav (1), stav (3) i stav (4) Zakona o finansiranju političkih stranaka i to:*
  - *da prihode ostvaruje od imovine koja je vlasništvu stranke,*
  - *da postupa u skladu sa odredbama člana 3. stav (2) Zakona o finansiranju političkih stranaka, odnosno da se oslobodi vlasništva nad pravim licem čija djelatnost nije vezana za izdavaštvo ili kulturu,*
  - *da u finansijskom izvještaju, u skladu sa članom 6. ovog zakona, prijavljuje sve priloge veće od 100,00 KM,*
  - *da ne prima zabranjene priloge,*
  - *da uspostavi odgovarajuće evidencije o svojim prihodima i rashodima,*
  - *da finansijske izvještaje koje podnosi Centralnoj izbornoj komisiji BiH popunjava u skladu sa Pravilnikom o godišnjim finansijskim izvještajima političkih stranaka i*
  - *da dostavlja dokumentaciju koju od nje zatraži Centralna izborna komisija Bosne i Hercegovine.*
- *da prihode i rashode priznaje u momentu njihovog nastanka (a ne u momentu naplate ili plaćanja), a knjiži u poslovnim knjigama za periode na koje se odnose, i*
- *da utvrdi stvarno stanje svojih obaveza po osnovu zakupnine poslovnih prostorija koje koriste odbori Stranke demokratske akcije i izvrši odgovarajuća knjiženja u poslovnim knjigama.*

### KOMENTAR:

U ostavljenom roku, Stranka demokratske akcije je dostavila primjedbe na nalaze navedene u Preliminarnom izvještaju o pregledu godišnjeg finansijskog izvještaja za 2009. godinu. Stranka je uz očitovanje dostavila i ispravljene obrasce 5 godišnjeg finansijskog izvještaja, čime je djelimično otklonila nedostatke u popunjavanju finansijskog izvještaja. Osim obrazaca, Stranka demokratske akcije je Službi za reviziju dostavila i dodatne dokaze o korištenju poslovnih prostorija, kao i dokumentaciju o provedenim radnjama oko uknjižbe prostora Hotela „Balkan“ u Zenici.

Služba za reviziju je razmotrila primjedbe Stranke demokratske akcije i uvažila argumentovane primjedbe, što je i ugrađeno u Izvještaj o pregledu godišnjeg finansijskog izvještaja za 2009. godinu.

Mr. Hasida Gušić, šef Službe za reviziju

Sanja Čabrilo, revizor

---

<sup>12</sup> Stranka demokratske akcije nije u svojim poslovnim knjigama evidentirala sve troškove zakupa za prostore, odnosno obaveze prema pravnim i fizičkim licima po osnovu zakupa.